



# Bájkkeavijssa NuorttaSálto

# Máske-vedja ávddápros buorre jádon

Tæksta: Kitty Skapalen  
Járggálibme: Divte Media AS/Ingrid Kintel

Máske-vedja ávddáprosjekta le állásit ruhtaduvvam, Salten Kartdata le laserijn mihttim væddjaruvtov ja Sweco Norge le oadtjum bargov álles prosjevtá gálojt mihttit.

Ietjá bágoj javladum lip buorre mudduj boahám økonomasj ja tehnikkalasj plánajn gáktu vedjav Másskáj oadtjot. Stivrimjuohkusa jádediddje Ronny Nergård le viehka dudálasj.

–Lidjiv álggotjáhkkanimen Sweco Norgejn dijjstagá ja viehka geldulasj ájgge le miján jur dálla, javllá Nergård.

## Gárves javlajda

Dálátijj vuojnnet ávddáprosjekta soajttá álliduvvat ádjáagijda.

- Mav Sweco Norge ávddán biedjá sjaddá viehka ájnas boahhte barggij ja dan duogen mierreduvvá jut prosjektajn joarkká, javllá Nergård.

Ávddáguoradallam sisadná skávveprosjektav mij gávvit ja kártti fysihkalasj ja økonomasj birástagájt prosjekta gáktuj, ietjá bágoj javladum de galggi gájka gálo ma vedjav gulluji tjelggat. Væddja- ja tunnelaguhkkudahka aktan væddjastandard galggá gávviduvvat ja gálo galggi aj kalkuleriduvvat vuodon politihkalasj mærrádussaj jut galggá joarkket.

- Mij le gus de boahhte lávkke gå ávddáprosjekta álliduvvá?

- Gá ávddáprosjekta le álliduvvam de sjaddá politihkalasj barggo gánná hæhttu ráddidusás ja stáhtas rudájt ádnót sjielvvi rahtebiggimij. Valla esski gå ávddáprosjekta álliduvvá de diehtep makta jáhkedahte plána li. Jus gálo duola dagu avta millijárd-daj merustaláduvvi de ij le jáhkedahte væddja boahá. Dáv hæhttu árvustallat skáve milta mij ávddán biejaduvvá, javllá Nergård. Boadosguoradallam ij gullu ávddáprosjektaj. Uddni ij gávnnu regulierimpládna Máske hárráj.

- Máske-Gidádime regulierimplánajn máhtta barggat vijdábut vedja dagi. Valla man stuorak regulierimpládna galggá, mierreduvvá massta Sweco ávddán biedjá. Gá kárttadiedo li gárvvása, boahhte vahko álgon, báhti Sweco guovlov lagábut guoradalátjit. Geologa galggá aj árvustallat guovlov. Hásstalus le guovllo le nav rádes, valla geologa gávnnu hiebalgis rahtesajev.

## Aktan ruhtadam

Sámedigge le juollodam gitta kr. 300.000 doarjjaj ávddáprosjektaj Máskevæddja dajna gájbbádusájn Divtasvuona suohkan galggá prosjektaæjgádin. Musken Laks AS ja Nord-Salten Kraft li goappátja juollodam kr. 200.000.

Lasermihttim mij le dagádum mierkki buoremus gárvedime li vedja prosjekterima gáktuj

ja regulierimplána bargo gáktuj.

- Navti oadtjop aj jáhkedahte báhtusav mij guosská gággu væddja galggá aktan jalástimij, devdadisáj ja massebálánsaj. Nágin vahko dássta ávddála lij Salten kartdata guovlov gehtjadime helikopterijn, javllá Nergård.

Máskevedja barggojuogos dat le guhti le Divtasvuona suohkanij vaddám ávdásvástádusáv ávddáprosjektav tjadádit. Juollodime li aj suohkanij vattedum, guhti le ietjas tjadnam ávddáprosjektav tjadádit.

## Aktan tjanádum jáhtelisvantsa dájmajn

MuskenSenter AS le ávddála guoradallam vedjav Másskáj. Pládnaguovllo le E6 rájes Sagpollenis. Tjáhpisjávre oarjjeallebielen gitta Másskáj ja prosjekta le Divtasvuona suohkanis giehtadaláduvvam. MuskenSenter AS milta le prosjekta dal sjávvunam danen gå boadosguoradallam gájbbeduvvá. Ássjepáhppárijn tjuodtju fylkkasuohkan le miedek mij guosská prosjevtav ruhtadit udnásj jáhtelisvanntsadoajmarrudáj. Háldadusoajvve vuonet prosjekta galgaj ruhtadaláduvvat Máske æládusprosjekta baktu, gánná elfábmobiggim ja viejekbutadibme lij guovdátjin. Háldadusoajvve Konrad Sætra le buorrelielak prosjevtá ávddánime hárráj dán rádjáj ja vuonet aktisasj barggosjiehtadussaj barggojuohkusijn, álgoldis væhkkáj ja álgoldis ruhtadibmáj. Vijdábut dættot Sætra prosjekta le buoragit sajáduvvam Máske ároj gaskan ja prosjekta doarjoduvvá almulasj ásadusájs ja priváhta viddnudagájs.

Máskevedja ávddáprosjekta le vuodon gå galggá mierredit jus prosjekta le tjadádahte tehnikkalasj tjoavddusij ja merustaládum gállodásijn aktan tjuovvovasj ruhtadimodellaj gáktuj. Dan maññela hæhttu mierreduvvat galggá gus boadosguoradallamav tjadádit mij ierit ietján tjelggá gáktu birás, luonndoboannudagá ja sebrudahka rievddá.

Jus ávddáprosjekta boados sjaddá væddjatjanástahka Másskáj le vejulasj de suohkan ávddánimplánav jáhtuj biedjá mij sisadná boadosguoradallamav ja regulierimplánav aktan barggat dan vuoksuj jut prosjekta økonomalattjat vuoroduvvá ja vuojnnsij boahá fylkkasuohka plánajn.



Guovlov kárttimin. Salten Kartdata le guovlov mihttim ja Sweco Norge le oadtjum bargov Kartlegger området. Salten Kartdata har foretatt målinger i området og det er Sweco Norge veiprojektet.